

**Diosen' chebeje' bene'
Israel ca' Egipto**



Dios saca a los israelitas de Egipto

Diosen' chebeje' bene' Israel ca' Egipto

Dios saca a los israelitas de Egipto

Resumen del Antiguo Testamento

en el zapoteco de Zoogocho

Volumen II

LA LIGA BÍBLICA



LAS SAGRADAS ESCRITURAS PARA TODOS

LIGA DEL SEMBRADOR, A.C.

“Las Sagradas Escrituras para todos”

Publicado por

LA LIGA DEL SEMBRADOR, A.C.

Apartado 14-351

07810 México, D.F.

La ilustración en blanco y negro opuesta a la página 1 así como las ilustraciones en las páginas 17, 37, 40, 42 y 47 son propiedad de la Fundación David C. Cook, usadas con permiso.

Primera edición

**Dios saca a los israelitas de Egipto
en el zapoteco de Zoogocho**

94-077 México, D.F. .5C

1994

Da' gole da' bžia Diosen' bia' gone'

Resumen del Antiguo Testamento

Este libro es el segundo volumen del Resumen del Antiguo Testamento que presentamos en una serie de siete.

- Volumen I:** Can' goc cate' gwxe yežlion'
Cómo comenzó el mundo
- Volumen II:** Diosen' chebeje' bene' Israel ca' Egipto
Dios saca a los israelitas de Egipto
- Volumen III:** Bene' Israel ca' gosone' güedenag len
Diosen'
Los israelitas desobedecieron a Dios
- Volumen IV:** Bene' gosaclene' nación Israel gwde
got da' Moisésen'
Los líderes de Israel después de la muerte
de Moisés
- Volumen V:** Cate' gosenabia' rey Saúl na' rey
David bene' Israel ca'
Los reinados de Saúl y David en Israel
- Volumen VI:** Diosen' bonite' nación Efraín da'
gosejnlaže' lgua'a lsaca'
Dios destruyó la nación de Efraín por su
idolatría
- Volumen VII:** Bene' Israel ca' besyega'ane' pres
Babilonia gayonši iz
Los israelitas fueron desterrados a
Babilonia por setenta años

Introducción

Xtiža' Dios nyojen diža'xtil le'e libr da' nzi' LA BIBLIA. Part nechw nzi' EL ANTIGUO TESTAMENTO, na' zejen Da' Gole Da' Bžia Diosen' Bia' Gone'. Part gwchope nzi' EL NUEVO TESTAMENTO, na' nyojen diža'xon le'e libr da' nzi' Diža' Güen Che Xancho Jesucristo.

Libr da' noxo' nga nzi' Can' Goc Cate' Gwxe Yežlion'. Naquen libr nechw lao gaže cuen libr da' chesoen' diža' ghe da' ca' zjanyoj le'e da' nzi' El Antiguo Testamento. Libr nechw nga nsan' da' zan da' žialao da' zjanyoj le'e part nechw che El Antiguo Testamento, part da' nzi' Génesis. Gague nyoj doxen Génesis de diža'xon cont beyaše'ch libr nga. Še chaclažo' gwlabo' doxen Génesis, cheyała' yeyiljon le'e Biblia de diža'xtil.

Índice

sección

página

23. Bene' Egipto ca' bi gosonde' güen.....	1
24. Moisés goclaže'be' gaclembe' bene' Israel ca'.....	3
25. Diosen' gože' Moisésen' cheyała' šjayeje' bene' Israel ca' Egipton'.....	6
26. Ben' chnabia' Egipton' bi chaclaže' yesyežaš bene' Israel ca'.....	11
27. Faraón ben' gwnabia' Egipton' bene' mandadw yesyežaš bene' Israel ca'.....	14
28. Diosen' goclene' bene' Israel ca' goselague' nisdao' da' nzi' Nisdao' Xna.....	18
29. Bene' Israel ca' gosa'aque' cho'a Nisdao' Xna zja'aque' ya'a da' nzi' Sinaí	22
30. Dan' goc lo ya'a da' nzi' Sinaí.....	26
31. Diosen' bzejni'ide' Moisésen' bichle da' bžie' bia' yesone'.....	29
32. Moisésen' bžie' chen che beyixe' bene' Israel ca'	32
33. Diosen' gože' Moisésen' yeson bene' Israel ca' to yodao' ga yesonxene' le'.....	33
34. Bene' Israel ca' bi bosozenague' che Diosen' na' gosone' to lgu'a'a lsaca'.....	38
35. Bene' Israel ca' gosone' yodao' che Diosen' da' chedobe	43
36. Diosen' gože' Moisésen' bica' da' ca' che'nde' šjasesan bene' Israel ca' yesonxene' le'.....	44
37. Bxoz ca' gosezolagüe' gosone' xšin Diosen'.....	45

38. Ley ca' da' žan can' cheyaļa' yeson bχoz ca'48
39. Čhope xi'in Aarónna' bi gosone' can' gwna
Diosen' na' gosate'49
40. Diosen' bi goclaže' yesagw bene' Israel ca' baļ
yeļa' guagw49
41. Diosen' gože' Moisésen' nac yeson bene' bi
zjanaque' xilaže' lagüen'51
42. Diosen' bžiache' bia' len Moisésen' bichle da'
goclaže' yeson bene' Israel ca'51
43. Diosen' gože' Moisésen' bica' ļni cheyaļa' yeson
bene' Israel ca' yesonxene' ļe'53
44. Gosote' to bene' gwņeye'e čhe Diosen'56
45. Diosen' bnežjue' Moisésen' ley da' bžian bia' čhe
yežlio na' čhe yo'o ca'56
46. Diosen' gože' Moisésen' nac cheyaļa' yeson bene'
yesonxen ļe'57



Rey ben' chnabia' Egipton' gwleje' legaque' zan cuen na' to
cuen güeje' bzoe' beñe' Egipto gosenabi'e legaque'.

23. Bene' Egipto ca' bi gosonde' güen bene' Israel ca'

(Éxodo 1)

Gwde got Josén' na' lecze gosat bene' biše' ca',
na' besyega'an diaža chegaque' Egipton' yezan iz.
Legaquen' bososi'e bene' Israel dan' gosaque' diaža
che da' Jacob, le Diosen' boše'e la Jacoben' gože'ne'
Israel. Na' gosenita'chgua bi' che bene' Israel ca', na'
zej gosanche', bžinte gosaque' bene' zantao'. Ca
tiempa' gwzolao chnabia' yeto bene' Egipton'. Benga
bi gwneзде' non' goc Josén' na' bi ble'etecde' bene'
Israel ca' güen dan' gosaque' bene' zantao'. Bžebe'
godde' cate' yesaque' bene' gualch na' yesenabi'e bene'
Egipto ca'. Da'nan' gwzolagüe' bzoe' legaque'
gosonchgüe' xšine' ca no beyixe'. Gwleje' legaque'
zan cuen na' to cuen güeje' bzoe' bene' Egipto
gosenabi'e legaque'. Gwdechle bzoe' legaque' gosone'
yo'o zan gan' gwleque' chope ciuda cobe ga
yesego'ošagüe' coseš ca'.

La'czla' gosac chegaque' ca', Diosen' bia'cze bgüia
gwne'e bene' Israel ca' na' goclene' legaque' cont
gosenita'ch xi'ine'. Da'nan' bene' Egipto ca'
beseža'ache' legaque' na' gosonchde' legaque' malech
clél can' ba chesonde' legaquen'. Lentecze faraónna'
bene' mandadw gože' no'ole Israel ca' chjaseletj bidao'
yesote' yogo' bi' byo dao' ca' chesalje. Perw no'ol
güeletj bidao' ca' bosozecnague' che Dios na' bi
bosozenague' che faraónna'. Diosen' bebede' dan'



Rey çe Egipto bzoe' beṇe' Israel ca' gosonchgüe' xšine' ca
no beyixe'.

bi gosot no'ol ca' bidaon', na' bene' ga gosacchgua
güen chegaque'. Nach faraónna' bene' mandadw gože'
bene' byo ca' ben' gosac bene' Israel yosozała' yogo'
bi' byo dao' chegaquen' lo' yegw xen da' nzi' Nilo
cate' yesaljbe'.

24. Moisés goclaže'be' gaclembe'

bene' Israel ca'

(Éxodo 2:1-22)

Ca tiempa' to bene' Israel len no'ol che' gwzoa to
bidaon' chegaque'. Xa bidaon' goque' bene' lo diaža
che xi'in da' Jacob ben' gože' Leví. Bidaon' golja'
gocbe' leca xdan, na' xna'ben' bi goclaže' šjazale'be'
lo' yegon' can' ben faraónna' mandadw, na' bcuaše'be'
liže' šon bio'. Perw gocbe'ede' bich saque'
gwcuaše'be' sša ližen'. Nach gwxi'e to žome na'
gwdebe' ca xche'e benj cožen' cont bi šožen nis,
gwdixjue' bidaon' lo'enna', na' gwlo'en lo' nisen' do ga
nac gała'ze cho'a yegon'. Na' bi' zan bidaon' bi'
ngolechbe' bocua'an xna'ben' lebe' gała'ze cho'a yegon'
cont gwna'be' bi zelao gac len žoma' gan' yo'o
bidaon'.

Gocze šlož, bi' no'ol che faraónna' gwyejbe' gozj
cho'a yegua' na' cate' bžimbe' latja' ble'ebe' žoma'.
Na' gožbe' to no'ol güen žin cheben' šjaxi'e žoma'.
Na' cate' gwsaljwben' na' ble'ebe' bidaon' lo'enna'. Ca
hora' bidaon' chbežbe', na' bi' no'ol che faraónna' leca

Esta ilustración
no está
disponible.

beyaše'be' lebe'. Nach jabiga' bi' zan bi' byo daon'
na' gožbe' bi' che faraónna':

—Še chaclažo' na' chiljua' to no'ole yosgole'
bidaon'.

Na' goclaže'be'. Da'nan' bi' zan bidaon' chxonjbe'
jaxi' xna'ben', na' bi' no'ol che faraónna' gwdixjwbe'
le' cont gwne'e bidaon'. Na' cate' gwcha'o bi' byo
daon', xna'ben' jaysane'be' lao bi' no'ol che faraónna'
na' gwca'abe' lebe' bembe' lebe' ca bi' chebe' na'
be'be' labe', bsi'be' lebe' Moisés.

Cate' Moisésen' goque' bene' xen, goc to ža
bchoje' gwde' do chaneza' na' ble'ede' bene' Israel
gualaž che' ca' catec chesonchgüe' žin, na'
beyaše'laže'de' legaque'. Gocze šlož ble'ede' to bene'
Egipton' chot chyne' to bene' Israelen' na' leca
bloque'. Gwne'e še ne to nono chna' le', nach betue'
bene' Egipton' na' bcuaše'ne' to lo' yox, gocde' cont
nono yežele le'.

Beyečhj ža cate' bezchoje' jate' chaneza', ble'ede'
chesedił chop bene' Israel. Na' jabigue' gwdiłe' ben'
chotlat bene' gualaž chen', gože'ne':

—Gague da' cheyała' tilieno' bene' gualaž chio'
nga.

Perw ben' bže'e Moisésen' na' gože'ne':

—¿No gwna le' gaco' bene' gwnabia' cont gono'
yela' justis cheto'?

Na' gwñabde'ne':

—¿Chacdo' lecze goto' neda' can' beno' len bene'
Egipto ben' beto' neje?

Moisésen' leca bžebe' cate' bende' can' gož ben'
le', le godce' yogo'ze bene' ba zjanezde'. Da' li bžin
rson lao faraónna' can' goca' na' bene' mandadw
yesote' Moisésen', perw Moisésen' bxonje' Egipton' na'
gwle'. Gwyeje' to latje gan' nzi' Madián na' jasoe' liž
to bxoz bene' zoa na'. Bžin ža bšagna'lene' to bi'
no'ol che bxoza' no'ole gože' Séfora, na' gosezoa to
bi' byo chegaque' na' goso'e labe' bososi'ebe' Gersón.

25. Diosen' gože' Moisésen' cheyała' šjayeje' bene' Israel ca' Egipton'

(Éxodo 2:23 — 4:31)

Goc zan iz got faraónna' ben' bža'a Moisésen' na'
bene' yoble bołane' xlatjen' chnabi'e. Diosen' ble'ede'
leca chesale' bene' Israel ca' bene' ca' ba gwleje'
zjanaque' lo ne'e, le bene' Egipto ca'
chososaca'zi'chgüe' legaque'. Na' Diosen' bzenague'
caten' bosolgiüiže'ne' gosenabe' gaclene' legaque'. Nach
Diosen' goclaže' gaclene' legaque'. Da'nan' bečhoglaže'
gwsele' Moisésen' cont jayeje' bene' Israel ca' zjaže'
Egipton'.

To ža cate' Moisésen' chde' yiže' chyo'e beyiže'
che xtaobi'in che', bžine' ya'a da' nzi' Horeb na'
ble'ede' to yag dao' čala'ninen, perw bi cheyaquen
de. Nach jabigue' cont ble'ede' bin' chac. Nach
Diosen' bolgiüiže' Moisésen' bi'e le', na' Moisésen'

Esta ilustración
no está
disponible.

**Moísesen' ble'ede' to yag dao' chala'ninen perw bi
cheyaquen de.**

boži'e xtižen'. Diosen' bene' mandadw gože'ne':

—Gwłęchj xelon', le lo yo ga nlejon' naquen chia'.

Beyoż ben Moisésen' ca' na' gože'ne':

—Nedan' naca' Dios che da' xoxxta'oguo' Abraham, Isaac na' Jacob. Ba ble'eda' can' chososaca'zi' bene' Egipto ca' bene' Israel gualaż chio' ca', na' che'nda' gacłengaca'ne'. Ba bechogłaża' yebejgaca'ne' Egipton' na' yeči'ane' Canaán gan' yežlion' naquen leca güen, na' mbachgua yesenite'. Na' che'nda' le' šejo' gan' zoa ben' chnabia' Egipton' na' šjašaljleno'ne'. Le' yebialagüo' yeči'o bene' Israel ca' cate' yesyežaše' Egipton'.

Moisésen' boži'e xtižen' gwne':

—Perw neda' bibi zaca'teca', bi gaca' gona' dan' nac ca'.

Na' Diosen' gože'ne':

—Neda' soacza' len le' cont gac gonon'.

Moisésen' gwnabde'ne':

—Cate' bene' Israel ca' yesenabde'nda' no gwsela' neda' ǂbixe yape'gaca'ne'?

Diosen' boži'en:

—Gožgaque' Dios ben' gosejnilaže' da' Abraham, da' Isaac na' da' Jacob gwsele' le'. Na' lia' NEDA' ZOACZA'. Zgua'tec gož da' qui ben' zjanac bene' gole blao che bene' Israel ca', nach txen šejle yogo'le na' ye'le faraónna' neda' bena' mandadw šejle yiže', to latje dan' chga'aṅ šone ža nez, cont šjetle zan beyixe'

čhele gonxenle neda'. Ne^zda' bi gaclaže' gwsane' le'e šejle, perw neda' gona' cont leca yesa^le' bene' Egipto ca'. Na' žin ža cate' faraónⁿa' gague con gwsanze' le'e šejle, san gone' mandadw yežaše.

Nach Moisésen' gože'ne':

—Bene' gole blao čhe bene' Israel ca' bi yesejle'e chia' cate' yape'gaca'ne' ca'.

Nach Diosen' gože' Moisésen':

—Bza^la' carrot dan' noxon' lo yo.

Na' ca' ben Moisésen' na' carroten' beyaquen to bel. Nach gože' Moisésen':

—Be^xo' xbamban'.

Na' cate' beyoxe' Moisésen' xbamban' beyacba' carrot da' yoble. Le^cze gože' Moisésen':

—Gwlo'o tacon' lo xaoⁿ'; yeyoža' yebejon'.

Bene' can' gwna Diosen' na' taquen' bedoten gwžia yežo', goquen ca da' zoa güe'chgua. Cate' ben Moisésen' da' yoble can' gože'nen' na' beyaque taquen'. Na' gwna Diosen':

—Cate' gono' čhop da' quinga bene' gole blao čhe bene' Israel ca' yesejli'e le nedan' gwsela' le'. Perw še bina' yesejle'e čhio', cheya^la' šjaxi'o late' nis dan' de yegw da' nzi' Nilo na' gwla^ljon' lo yon' na' yesele'ede' yeyaquen chen.

Perw Moisésen' ne' chaž chžebe' gone' dan' chaclaže' Diosen' gone', na' gwne':

—Bitw na' nia' binlo ga že' bene'. Chat choa'.

Diosen' gože'ne':

—Jaysa'lažo' nedan' naca' Dios ben' ben cho'on.
Gwey' na' jen dan' ba gwnia' le' gono'. Neda'
gaclena' le' cont gac nio' binlo ga že' bene'.

Perw Moisésen' bi chaclaže', na' gw^unabde' Diosen'
sele' yeto bene' yoble. Diosen' bloque' Moisésen' dan'
gw^unabde'ne' dan' nac ca', perw gože'ne':

—Bene' bišo' Aarón guac gaclen le'. Neda' nia'
zgua'tec le', na' le' yo'o Aarón^una' dan' yapa' le', na'
le' ye'e bene' ca' yezica'chle. Le' yežague' le' cate'
zengo'o nez zjaydao' Egipto.

Moisésen' gweyje' gan' zoa xtaobi'i^un che' na'
gw^unabe' gwnežjue' lsens che' cont yeyeje' šjay^una'
bene' diaža' che' nita' Egipto, na' Jetro ben' goc
xtaobi'i^un chen' goclaže'. Nach Moisésen' len no'ol
che' na' len bi' che' ca' gosa'aque' zja'aque' Egipto.
Diosen' bene' ba ša' gat Moisésen' chanez dan' bi
nzoa bi' byo chen' señw da' nzi' circuncición. Cate
la' bzoate no'ol chen' lebe' señua', nach be' Diosen'
latje gosego'oche' nez.

Na' Diosen' gože' Aarón^una' šjašague' Moisésen'.
Da'nan' besyežague' chanez. Nach Moisésen' be'e diža'
len Aarón^una' yogo' can' gož Diosen' le', na' gwdechle
chope' bosotobe' yogo' bene' gole blao che bene'
Israel ca'. Aarón^una' be'lene' lega^uque' diža' yogo' can'
ba gož Diosen' Moisésen' na' bosolo'ede' lega^uque' can'
cheyac carrot chen' be^l na' cheyoža' cheyaquen carrot

da' yoble, na' can' chedote taca' Moisésen' chbian
yežo', chaquen ca da' zoa güe'chgua, na' cheyoža'
cheyaquen binlo. Can' goc, bene' gole blao che bene'
Israel ca' gosejle'e do laže'cze' Diosen' gaclene'
legaque', na' bosozoa xibe' gosonxene'ne'.

26. Ben' chnabia' Egipton' bi chaclaže' yesyežaš bene' Israel ca'

(Éxodo 5 — 10)

Moisésen' na' Aarónna' jasa'aque' jasene'e faraón
ben' chnabia' Egipton'. Na' gose'ene':

—Dios che neto' bene' Israel, ben' chejnilaže'to',
none' mandaw šejto' yixe' na' gonto' to lni che'.

Perw faraónna' gwne':

—Bi cuent chia'nda' non' chejnilaže'le. Bi gac
šejle. Con chene'le cuecle da' zed cont bene' Israel
ca' yezica'chle bi yesone' žin.

Na' faraónna' gože' bene' Egipto ca' yosogonche'
bene' Israel ca' žin. Lecze gože' legaque' bich
yosonežjue'ne' da' nac ca yix dan' chosočhine' cate'
chesone' bso, perw con cheyała'cze yesone' bso zan
ca'te'te' dan' chesoncze' tža güeje cana'ate. Faraónna'
gwne' bene' Israel ca' zjanaque' bene' xagüed, da'nan'
chesaclaže' yesežaše' šja'aque' yixe' šjasene' to lni xen
che Dios ben' chesejnilaže'. Cate' gota'bia' bene'
Israel ca' bich chesonteque' bso zan, le cuincze'
chja'aque' chjasexi'e dan' nac ca yix, nach bene'
Egipto ca' gosot goseyine' legaque'. Da'nan' bene'

Israel ca' beseže'e Moisésen' len Aarónna', le gualaz da' yososle' legaque' lo žin guala', nachle bososcha'ogüe' dan' chesac chen'. Moisésen' gweyeje' na' jalgüiže' Diosen', gože'ne':




—¿Bixchen' chondo' neto' dan' nac qui Xana'? Chale'chto' na'a clel ca cana'.

Diosen' bechebe' na' gwne':

—Toz da' le gon, le cueze na' le'ele gac yogo' dan' ba gwnian'. Faraónna' gone' mandadw yežašle Egipton' na' neda' chi'a le'e gan' mbane Canaán na' gonan' chele.

Nach Moisésen' beyeje' jayeže' bene' gole blao che bene' Israel ca' can' gwna Diosen', perw legaque' bich bosozenague' che'.

Moisésen' na' Aarónna' jaya'aque' gan' zoa faraónna' na' Aarónna' bzała' carrot chen' lo yo na' beyaquen bel, perw faraónna' bi goclaže' gwzenague' chegaque'. Nach Diosen' gože' Moisésen' ye'e Aarónna' šjaze carrot chen' lo yegw da' nzi' Nilo cont nis dan' den yeyaquen chen. Nach Moisésen' len Aarónna' gosone' can' gož Diosen' legaque' na' yogo' bel ca' zjaže' lo' nisen' gosatba' na' bi gota' nis da' yese'eje'. Ne ca' faraónna' bi goclaže' gwsane' bene' Israel ca'. Nach Diosen' gwseła'che' da' zanch da' gosezaca'zi' bene' Egipto ca'. Gwsele' leca zan blož, nach beše', na' gwdech gwsele' bi'a, perw bi'an bitw besežimba' gan' nzi' Gosén gan' gosenita' bene' Israel ca'.



Ši yela' zi' da' gwseła' Dios ɕhe bene' Egipto ca'.

Nach Diosen' gwsele' to yižgüe' da' beton yogo'lo| beyixe' che bene' Egipto ca', perw beyixe' che bene' Israel ca' bibi gosaqueba'. Gwdechle Diosen' bene' cont bene' Egipto ca' gosa|e'de' gosebie' güe', nach bene' cont gwche'chgua yej na' bžiyain' da' zcha'o coseš chegaque', perw bitw gwche' yejen' gan' zjanita' bene' Israel ca'. Nach Diosen' gwsele' biše'zo be gosagwba' yogo' da' bega'an lao coseš che bene' Egipto ca'. Gwdechle bene' goc chol doxen Egipton', perw bi goc ca' gan' nzi' Gosén gan' gosenita' bene' Israel ca'. Lao šone ža, do ža do yel gocchgua chol. Ga yela' zi' dan' gwse|a' Diosen' che bene' Egipto ca'.

Caten' bžin to to da' mal ca' gwse|en', faraónna' gwne' na'ach gwsane' bene' Israel ca' šjaya'aque'; perw to to ni'a cate' gwnabe Moisésen' Diosen' gwcueze' yela' zin', faraónna' betinjde' can' ba gwnen' na' bich bsane' legaue' šjaya'aque'. Na' Diosen' gože' Moisésen' len' cho'e latje zoa faraónna' contze yesele'e benach catec bene' zaca' nac Diosen'.

27. Faraón ben' gwnabia' Egipton' bene' mandadw yesyežaš bene' Israel ca'

(Éxodo 11:1 — 13:16)

Faraón ben' gwnabia' Egipton' bi|a' güe'e latje yesyežaš bene' Israel ca'. Da'nan' bechoglaže' Diosen' gwsele' yeto yela' zi' bzebe che bene' Egipto ca'. Bechoglaže' yesat bi' byo nac bi' nechw che to to yo'o doxen Egipton', lecze ca' yesac che yogo' beyixe' be zjanac be nechw chegaue'. Perw ne to da' qui ca yesac che bene' Israel ca', le Diosen' gože' Moisésen'

len Aarónna' nac yeson bene' Israel ca' cont bi yesat bi' byo zjanac bi' nechw che to to yo'o chegaque', na' lecze bi yesat beyixe' nechw che to toe'.

Gože' legaque' caten' nac ža ši che lo bio' na', to to lo' yo'o bene' cheyała' yesezene' to šib o to xila' dao' be ba zoa tgüiz, be ne to bibi naque, na' yesego'ošagüe'ba' žinte ža žta' che lo bion'. Še to lo' yo'on bi zjanyanteque', guac yosoghine' toze beyixe' chop yo'on'. Ža žta' che lo bion' cheyała' yesote'ba' cate' xoa gwbiž na' yeseyebe' late' güeje xchemban' le'e bdodo' na' len le'e cuaga' che puert ca'. To to lo' yo'o cheyała' yesyega'an ližgaque' na' yesezoe' na'ze cate'ch yeyečhj ža. Cheyała' yesoye' xpela'ban', na' yesagüen' len yixe' zła' na' len yetextil da' bibi levadura yo'o. Na' ne to žit da' yo'o beyixen' ca cheyała' goxj. Še yecho'onen bela', cheyała' šeyen. Cheyała' yesagüen' zjanlejteze xele', ca to bene' ba zoa se'e šeje' zito'. Da' nga gož Diosen' Moisésen' na' Aarónna'.

Moisésen' gože' bene' gole blao che bene' Israel ca' yogo' da' qui. Na' yogo' bene' Israel ca' gosone' yogo' da' ca' gwna Diosen' cheyała' yesone' len bene' lo' yo'o chegaque'. Nach Diosen' bene' cont gosat yogo' bi' nac bi' byo nechw che bene' Egipto ca' na' beyixe' be zjanac be nechw chegaque', perw na' liž bene' Israel ca' gan' ble'ede' chen cho'a puerta', nono gosat, con gwdeze' cho'a puerta'. Lo že' na'te gwzolaon chesone' lni da' nzi' pascw.

Cate' goła' chel got bi' nac bi' byo nechw che to to bene' Egipto ca' na' lecze gosat beyixe' nechw che to toe'. Lecze got bi' byo nechw che faraónna'. Lo že' na'te faraónna' bene' mandadw yesyežaš bene' Israel ca'. Nach bene' Israel ca' bosyotobe' cuazi dan' chesone' yetextil cate' za' yesegüe'en da' nzi' levadura, na' lecze bosyotobe' bica'ch da' zjanac chegaque'. Lecze gosenabde' bene' Egipto ca' bichle da' yoble, no ret, no bga da' zjazaca'chgua, na' len no lache', na' legaque' bosonežjuen'. Nach bene' Israel ca' besyeya'aque' Egipton' lo že' na'te jaya'aque' to yež da' nzi' Sucot. Zjanac ca do xop gayoa mil bene' byo zesyenche' bene' lo' yo'o na' beyixe' chegaque'. Bene' Israel ca' gosenite' Egipton' tap gayoa šichoa iz.

Diosen' gože' legaque' yogüiz cheyała' yesone' lni da' nzi' pascw cont šjasyeze'ede' da' güenna' dan' goc lo že'na'. Cheyała' yesote' to xila' dao' o to šib con can' gosone' lo že' caten' besyechoje' Egipton', na' cheyała' yesešaše' doxen levadura da' zjade lo' yo'o chegaque' cate' za' gała' lnin'. Yetextilen' bi cheyała' yesegüe'en levadura na' cheyała' yesagüe' yetextil dan' nac ca' lao to xman. Yesone' ca' cont šjasyeze'ede' ca bedao'nez besyežaše' Egipton' na' bi goła' yesego'o yetextil chen' levadura. Diosen' gože' yogo' bene' Israel ca' yesone' lnin' na' yeso'e diža' len xi'ingaque' bixchen' chesonen'.

Nach Diosen' gože' bene' Israel ca':



Cate' gosat yogo' bi' byo nechw che bene' Egipto, bene'
Israel ca' goseyebe' chen le'e bdodo' na' cuaga' che puert
chegaque' cont nono bi' chegaque' gosat.

—Cheyała' cuejle bi' nechw bi' nac bi' byo che to to lo' yo'o na' be nac be nechw be yag lao beyixe' chelen' cont gonxenle neda', le nedan' bosla' le'e lo yela' got lo že' cate' gosat bi' byo nechw che bene' Egipto ca'.

Na' ca nac be ca' zjanac be yag be yesalje da' nechw lao beyixe' che' ca', bene' mandadw yesote'ba' cont yesonxene'ne'. Perw zan cuen beyixe' bi zjazaca'ba' par yesonxene' Dios. Na' gože' legaque' guac yesote' yeto beyixe' yoble cont bi yesote' beyixe' nechw ca' ben' bi zjazaca' par yesonxene' Dios. Gualaz legacba' guac yesote' to xila' o to šib par yesonxene'ne'. Lecze cheyała' yesote' to xila' o to šib cont yeseyixjue' yela' mban che to to bi' byo nechw chegaquen'. Diosen' gože' legaque' cheyała' yeso'e diža' len bi' che' ca' bi yesanlaže'be' can' goclen Diosen' legacbe'.

28. Diosen' goclene' bene' Israel ca' gosełague' nisdao' da' nzi' Nisdao' Xna

(Éxodo 13:17 — 15:21)

Nez da' bi nactec zito' da' chza' Egipton' chžinen ga mbane Canaán chden latje gan' zjaže' bene' zito' ca' zjanzi' filisteos, perw Diosen' bi goclaže' šjasa'ac bene' Israel ca' neza', le bene' xbab bi yeson chach laže' cate' bene' filisteos ca' šjasexenyale' legaque' cont yosotile'ne' yesote'ne'. Da'nan' Diosen' gwche'e legaque' nez dan' nac da' tonech dan' zej gan' bi nłaga'tec da' nzi' Nisdao' Xna. Cate' besechoje' yež da' nzi' Sucot, Diosen' gwlo'e legaque' nez. Lagüe ža bcuialagüe' laogaque' to bejw da' goquen ca to bdope

xen, na' chel bejon' goctiten ca to yi' bel, na' bseⁿin'
xⁿezgaquen' cont goc gosego'oche' nez. Lao zjang^üe'e
neza' zes^yeno'e žit beⁿat ^čhe da' Josen', le can' gože'
lega^que' cheya^la' yesone', yesyeyo'en cate'
yesyeya'aque' Egipto cont šjasecuašen' Canaán gan'
yesyežine'.

Cate' beⁿe' Israel ca' besežine' latje gan' nzi' Etán,
Diosen' gože'ne' yeson xišna'ga^que' cho'a nisdao' da'
nzi' Nisdao' Xⁿa. Diosen' goclaže' faraónⁿa' gone'
xbab zjade da' zed ^čhe beⁿe' Israelen' do lo neza' na'
šjana'og^üe' lega^que' len soldadw ^čhe' ca', da'nan' gož
Diosen' lega^que' yesyega'ane' cho'a nisd^aon'. Nach
beⁿe' Israel ca' goson xišne'e cho'a nisd^aon'. Faraónⁿa'
na' len beⁿe' ca' cheson len le' žin, gosene':

—Xbab tonten' bencho bsancho beⁿe' Israel ca'
zjaya'aque'.

Nach bosotobe' beⁿe' zan soldadw ^čhega^que' na'
gosa'aque' zjana'og^üe' beⁿe' Israel ca', zjanse'e carret
da' chej lao gwdi^le, na' žialao faraónⁿa'. Cate' beⁿe'
Israel ca' besele'ede' lega^que' zja'aque' ga^la'ze,
besežebch^üe' na' bosol^güiže' Dios gosen^abde'ne'
gaclene' lega^que'. Lecze gosag^üe' xya lao Moisésen'
gose'ene' gocch güen ^čhega^que' šaca' besyega'ane'
Egipton', perw Moisésen' gože' lega^que':

—Bitw žeble, le ⁿašc na' le'ele can' gon Diosen'
yosle' le'e ⁿa'aža. Gag^ue yesšach Diosen' yosol
yonite' soldadw ^čhe beⁿe' Egipto qui, na' gwbatech
le'elene'.

Esta ilustración
no está
disponible.

Diosen' goclene' bene' Israel ca' gosełague' nisdao' da' nzi'
Nisdao' Xna, bene' cont nisdao' bchojen ċhople na' gosedia'
lo nez dan' byaljo lo nidaon'.

Beyoža' Diosen' gože' Moisésen' gone' mandadw yesyeya'ac bene' Israel ca' gan' zjanon xišne'en, na' lise' carrot chen' lo nis dan' nzi' Nisdao' Xna, cont na' nisen' chojen chople, na' xoa to nez gata' yo biž lo nisa'. Nach Diosen' bte' bejw dan' žialao lao bene' Israel ca' na' bzoen' cože' gan' zjaniten'. Can' goc bga'an bejon' gachol gan' nita' bene' Israel ca' len bene' Egipto ca', na' bene' Egipto ca' bi goc yesele'ede' bene' Israel ca', na' neche bejoa' byobch gol že'na'. Do yel gwyechjchgua to be' na' gwlejen nisa' chople. Can' goc, bene' Israel ca' gosodie' lo nez dan' byaljo lo nisdaon' na' gosełague' yešla'ale nisa'. Na' šlac chesełague' nisen', gwzoan ca' zoa ze'e chop la'a cuitgaquen'.

Cate' bene' Egipto ca' besele'ede' nez dan' xoa lo nisdaon', lecze gosacłaže' yeselaguen' le zja'aque' zjana'ogüe' bene' Israel ca'. Perw Diosen' bene' cont bene' Egipto ca' gosata' da' zed chegaque'. Rued dan' zjažia carret ca' gosagan', na' cane goc bosoten'.

Cate' yogo' bene' Israel ca' ba gosełague' nisdaon', Diosen' bene' mandadw gože' Moisésen' cos ne'en da' yoble lo nisa', na' cate' bene' ca', nisa' begoden' da' yoble. Na' bene' Egipto ca' ben' zja'ac lo nez dan' xoa lo nisa', bguacw nisa' legaque' na' gosate' gose'eje' nis. Yogo' bene' Israel ca' ba zjanite' yešla'ale zjambane'. Can' ben Diosen' bosle' bene' Israel ca' lo na' bene' Egipto ca'.

Cate' bene' Israel ca' besele'ede' can' ben Diosen' len legaque', leca besyebande' can' nac yela' zaca'

chen', na' gosejnilaže'ne', na' bich besexožde' Moisés
bene' güen žin che Diosen'. Nach gosebeje' to da'
gosoļe' lao Diosen' dan' choen' diža' can' goca'.
Quinga gosoļe':

Gonxencho Dios, ļe ba bosle' chio'.

Bene' cont bene' Egipto ca' ben' besegue'e chio'
gosate' gose'eje' nis ļo Nisdao' Xnan'.

Nono Dios zoa ca ļe'.

Le' chgüia chne'e chio' na' ngüe'e chio' nez
da' zej Canaán.

29. Bene' Israel ca' gosa'aque' cho'a Nisdao' Xna zja'aque' ya'a da' nzi' Sinaí

(Éxodo 15:22 — 17:16)

Moisésen' gwlo'e bene' Israel ca' nez gosa'aque'
cho'a nisdao' da' nzi' Nisdao' Xna, zja'aque' to latje
daš, na' gosegüe'e nez šone ža nēca beseželde' nis.
Perw na' besežine' to latje ga nzi' Mara na' žia to
bej, perw nisa' naquen zļa'. Nach yogüe' gosezolagüe'
chesagüe' xya che nisen' na' Moisésen' gwnabde'
Diosen' bi cheyaļa' gone'. Diosen' blo'ede'ne' to yag
da' bzāļe' ļo nisa' cont beyonen nisen' güen. Na'
yogüe' gose'eje' nis da' nac binļo. Latjna' ga nzi'
Mara Diosen' gože' ļegaque' bate'teze cheyaļa' yesone'
da' že', cont bi yesāļe'de' ne to da' mal ca nac dan'
gwseļe' che bene' Egipto ca'. Nach ja'aque' to latje
da' nzi' Elim, gan' gosebia šižinw bej, na' goson
xišne'e ga besyezi'laže'.

Gwdechle gosa'aque' ga nzi' Elim na' gosego'ochē' nez, na' da' yoble beñe' ca' gosagüe' xya lao Moisésen' gosene' yejnī'a ša besyega'ane' Egipto na'zen' gan' de da' yese'ej yesagüe', clēl ca' yesate' gwbin lo latje dašen'. Na' Moisésen' gože' legaue':

—Gague chia' nedan' chagwle xya, san chagwle xya che Diosen' žale ca', na' Dios gone' da' ye'ej da' gagwle.

Nach cate' ba zoa xin Diosen' gwsele' to cue' xen btao' gosašba' gosezoba' do gan' zjanon xišne'en, na' yogüe' gosezene' btaon' na' gosata' xpele' be gosagüe'.

Beyečhj ža cate' bich bi xilalj de, beñe' Israel ca' besele'ede' lo yon' naquen šiš ca' nac ga blažo' xilalj do yel le nasechgua da' nac ca' xsa cuan bela'. Nach Moisésen' gože' legaue' naquen yela' guagw da' yesagüe' da' gwseļa' Dios. Gože' legaue' yogo' zil cheyaļa' yesežaše' yosyotobe' čhop litrw güeje che to to beñe', perw bi yosyotobe' da' zča'och. Lecze gože' legaue' bi cheyaļa' yesego'ošagüen' par ža yoble, le še yesone' ca', yesaljen güilao'. Perw gože' legaue' bi cheyaļa' yosyotoben' lo ža dan' nac che Dios žan' chesyezi'laže', san yeto ža za' žinle žan' yosyotobe' čhop ca'ate'len' na' ža nga bitwbi gaquen.

Nach beñe' ca' besežaše' jasetobe' yela' guagw šiša', na' gosac che' cate' bosochixen', gota' che to toe' con gaca'te' beseyažjde'. Perw na' baļe' bi bosozenague' che Moisésen' na' gosego'ošagüen' par yeyečhj ža, na' goc can' gož Diosen' legaue', gosaljen güilao' na' gwļa'chguan zban. Lecze gozac

Esta ilustración
no está
disponible.

**Yogo' ža beṇe' Israel ca' jasetobe' yeḷa' guagw da' gwseḷa'
Dios da' nac šiš na' nac ca xsa cuan bela'.**

ɕhe yeba| bene' ca' bi bosyotobe' ɕhop ca'aten' yeto
 ʒa za' ʒin|e ʒa dan' nac ɕhe Dios caten'
 chesyezi'laʒe', na' beseʒaʒe' yosyotoben' lo ʒa dan' nac
 ɕhe Dios, perw bitw bi beseʒelde' lo ʒana', le
 Diosen' goclaʒe' yesyezi'laʒe'. Can' goc, legaue'
 gosej|e'e yogo' dan' goʒ Diosen' Moisésen' ɕhe yela'
 guagw šišen' da' bososi'e maná. Bdagon ca gallet da'
 nɕhiɕe šina' beser, na' goc bosoc|inen' cont gosonen'
 yet o niseye'.

Diosen' goʒe' Moisésen' yosše'e to xguague da'
 choʒ ɕhop litrw cue'en maná na' gwzoašagüen' cont
 bene' lo diaʒa ɕhegaue' ca' yesenezde' can' nac yela'
 guagw da' bneʒjw Diosen' legaue', na' ca' ben
 Moisésen'. Bene' Israel ca' bosyotobe' maná yogo' ʒa,
 con toze ʒa ɕhe Dios ʒa caten' chesyezi'laʒe' bi
 bosyotoben', na' len gosagüe' beseʒintie' Canaán.

Gwdechle bene' Israel ca' gosa'acche' beseʒintie'
 latje ga nzi' Refidim na' goson xišne'e. Da' yoble
 bibi nis gota' da' yese'eje', na' da' yoble gosagüe' xya
 len Moisésen', gose'ene' yogüe' yesate' yela' chbi|e
 nis. Na' le' goʒe' legaue' bi cheya|a' yesagüe' xya
 ɕhe Dios da' chac ɕhegaue' ca'. Nach gwnabde'
 Diosen' bi cheya|a' gone', na' Diosen' goʒe'ne' goxe'
 carrot ɕhen' da' yoble dan' gwdine' yegw da' nzi' Nilo
 cate' ne' nite' Egipton', na' gwzeten' le'e to yej xen.
 Na' cate' bzeta' carrot ɕhe Moisésen' le'e yeja'
 zjanita'te bene' gole blao ɕhe bene' Israel ca'
 besele'ede' bla' nis le'e yeja' na' yogo' bene' Israel ca'
 gose'eje' nisa'.

Latje na' zjaže' bene' ca' bososi'e amalecitas, ben' gosalj lo diaža che da' Esaú bene' biše' da' Jacob, na' cate' gosenezde' do na' chesaš bene' Israel ca', besežaše' cont yesote' legaque'. Nach Moisésen' gwsele' Josué len to xonj soldadw bene' Israel cont yesedillene' legaque', na' goson bene' Israel ca' gan. Na' Diosen' gože' Moisésen' ye'e Josué'n gwtaše' yogo' bene' ca'.

30. Dan' goc lo ya'a da' nzi' Sinaí

(Éxodo 19:1 — 20:20)

Bene' Israel ca' ja'aque' latje da' nzi' Sinaí, na' goson xišne'e gała'ze gan' zoa ya'a da' nzi' Sinaí. Nach Moisésen' gwloe' lo ya'an, na' Diosen' gože'ne':

—Gwey na' jaysa'alaže' yogo' bene' Israel ca' can' bena' goclengaca'ne' caten' gwseła' yela' zi' ca' gosac che bene' Egipto ca'. Lecze jaysa'alaže' ca binlo ba bgüia gwña'ane' na' nche'gaca'ne' latje nga, le latje nga che'nda' gwzejni'igacda'ne' da' güen da' chaclaža' gona' len legaque'. Še legaque' yosozenague' chia' na' yesone' dan' gwžia' bia' yesone', nach yesaque' lo na'. Neda' chnabi'a lao yogo' bene' zjaže' lo yežlion', perw ba gwleja' legaque' yesaque' lo na' cont yosolo'ede' bene' yoble can' naca' neda'.

Moisésen' beyeje' gan' nita' yezica'chle bene' Israel ca' na' gože' legaque' dan' gož Diosen' le', na' legaque' gosechebe' yesone' dan' gwžia Diosen' bia'.

Nach da' yoble begüe Moisésen' lo ya'an, na' gože' Diosen' ba gosečheb bene' ca'. Na' Diosen' gwne':

—Na' na'a che'nda' co'ole to le'ej da' šečhj ya'a nga cont ne to nono cue len neca goxe' senen'. Le še to bene' gon ca', bene' ca' yezica'chle cheyała' yesote'ne' yosočhele'ne' yej. Gož bene' ca' yeseyib xałane', na' bene' byon' bi yesata'len no'ol čhegaque', le yešon ža cana' yetja' yedesoa' lo ya'a nga.

Moisésen' gože' bene' ca' dan' gož Diosen' le', na' cate' goc šon ža, gwche'chgua bejw lo ya'an, gošj gwtinchgua gwyaz yi' gwzio', na' gwche' žen. Na' besežebchgüe' cate' gosende' gwchežchgua to trompeta. Nach Moisésen' btobe' yogo' bene' ca' xan ya'an, na' Diosen' gože' Moisésen' cue'. Beyoža' Diosen' gože' Moisésen' yeyetje' cont da' yoble šjayeže' bene' ca' bi cheyała' yeselague' le'eja'. Na' beyetje' gože' legaque' can' gwna Diosen'.

Nach Diosen' gwnie' gan' zelao nac sib lo ya'an, gože' bene' ca':

—Neda' naca' Xanle Dios, nedan' bebeja' le'e Egipton' gan' gwzoale benle xšin bene' ca' ca no beyixe' čhegaque'.

`Noch no bene' yoble o bichle da' yoble cheyała' šejnilaže'le.

`Nono lgua'a lsaca' čhe gonle, neca gonxenle lgua'a lsaca' da' ba zjanon bene', le chaclaža' gonxenle toz neda'.

`Bi güe'le lan' nacteze, le gwnežjua' castigw che
no gon ca'.

`Zalaže'gale yezi'laže'le lo žan' nac chia'. Guac
gonle žin ža ca' yexop, perw ža gažen' ne to nono
cheyala' gon žin, ne ben' cheson žin ližle, ne beyixe'
chele. Bi ganlaže'le neda' bena' yaban' len yežlion'
lao xop žaze, na' ža gaže bezi'laža'. Gwxeten ža
na'ate ža gažen' bi naquen toze ca naquen len ža ca'
yezica'chle.

`Le gap bala'an xaxna'le cont neda' gona' soale
zan iz caten' šjazoale yežlio dan' gona' le'e.

`Ne to nono gotle.

`Bi gata'lenle bene' bi nac no'ol chele o bene' byo
bi nac bene' chele.

`Gwbət cheyala' cuanle.

`Bi cheyala' nele diža' güenlaže' che bene' lježle.

`Bi cheyala' selaže'le gac lo na'le xo'ole bene',
liže', bene' güen žin che', beyixe' che' o bite'teze da'
nac che bene' yoble.

Can' gož Diosen' bene' Israel ca'.

Bene' ca' besežebe' cate' gosende' gwne Diosen',
na' gosata'yoede' Moisésen' ye'e Diosen' bich güe'lene'
legaque' diža', san bate'teze Moisésen' ye'e legaque' bi
da' na Diosen'. Besežebe' yesate' še yesende' ne
Diosen3' da' yoble. Moisésen' gože' legaque' bi
cheyala' yesežebe', le toz da' che'ne Diosen' yesežebe',
še yesone' da' xinj.

31. Diosen' bzejni'ide' Moisésen' bichle da' bžie' bia' yesone'

(Éxodo 20:21 — 23:33)

Moisésen' gozeje' gan' zelao nac sibe lo ya'a da' nzi' Sinaí, gan' ngaše' Diosen' to lo' bejw, na' gwnelen Diosen' le', gože'ne':

—Gož yogo' bene' Israel ca' dan' nia' le' na'a. Jaysa'alaže' ba besele'ede' bolgüizgaca'ne' le'e yaba na'ate. Bi cheyała' yesone' lgua'a lsaca' de no oro, no plata, no, cont yesonxenen'. Cate' chese'nde' yesonxene' neda', cheyała' yesone' ca to mes de yo o de yej da' bi nchojbia'.

Nach Diosen' bnežjue'ne' ley da' žan to čhop can' cheyała' yesone' da' nac to liča len bene' cheseque'e cont chesondadze' xšingaque'. Na' lecze bžie' bia' nac cheyała' yesone' yela' güexi'a cate' de bi da' zed čhegaque', še ba gosone' xya len bene' o len bi da' zjade čhe'.

Qui gwna Diosen':

—Še le'e ga'ole to bene' güen žin bene' nac bene' gualaž čhele, guac gaque' lo na'le zelao xop iz, na' gwsanlne' cate' ca'a iz gaže, perw še gwnežjwle xo'ole' cate' ne' naque' bene' güen žin čhele, bi gac yečhe'e xo'olen', neca gac yečhe'e bi' čhegaquen' cate' yeze'e ližlen', perw še bene' byon' chacde' xo'olen' len bi' čhe' ca' na' lecz ca' xanen', guac yega'ane'. Nach xanen' cheyała' čhidjue' yid nagen' na' bene' byon' gacche' bene' güen žin čhe' yešlale mbane'.

`Na' še to bene' byo ga'ogüe' to no'ole gaque' bene' güen žin che' na' gata'lene' le' ca no'ol che', cheyała' gonde' le' ca xo'ole', cheyała' güe'e le' da' ye'ej gagüe' na' xałane' na' gata'lenczcze' le' la'czła' que'e no'ol yoble gaque' xo'ole'. Še to bene' gwnežjue' to no'ol güen žin chen' ca'a bi' byo chen' le' gaque' xo'ole', cheyała' gonde' no'ola' ca xo'oliže'. Bi de latje yesote' to bene' güen žin, na' še yesot yeseyine' le' na' neche da' yesonde' le' ca' cuiayi' to yejlagüe' o to laye', nach cheyała' yososane' le' cont gaxjw xyan' da' gosonde' le'.

`Cheyała' gotle bene' gote' to bene', perw še bi benczede' betue' le', ben' gon ca' guac se'e šjasoe' yeto yež ga nono gon le' zed. Perw še benczede', bi cheyała' gwsanłne' gacbane', la'czła' šeje' šjexoe' da' toše' ca' zjanita' squin che mes gan' chesote' beyixe' chesonxene' neda', gan' chacde' nono yeyaxje gote'ne'. Lecze cheyała' gat ben' got chin xaxne'e o gadoe'ne' diža'. Lecze cheyała' gat ben' che'xoxje' na' cuane' to bene' yoble.

`Še to bene' cuane' to beyixe' na' gote'ba' o gote'ba' si' bene' leba', še nacba' to goŋ cheyała' yonežjue' gayo'ba'. Še nacba' to xila' cheyała' yonežjue' tapba'. Še ne' nac lo ne'e beyixen' gwlanen', cheyała' yonežjue'ba' xamban' len yeto be yoble.

`Še to bene' gwxcn yi' lagüe chen' na' yin' goncn xya lagüe che bene' yoble, ben' gwxcn yin' cheyała' chixjue' len coseš da' nac che' dan' gwžiaye'e che

bene' yoble. Can' cheyała' gon note'teze, cheyała' chixjue' to güe' o bite'teze da' xinj da' gonde' bene' yoble. Na' še to bene' gote' yeto bene', lecze cheyała' gate'. Še to bene' gone' güe' yeto bene' yoble, lecze castigon' nac ca' cheyała' si'e.

Diosen' bnežjue' bene' Israel ca' ley quinga cont yesone' da' nac to licha len lježe'.

Diosen' lecze bnežjue' Moisésen' ley yoble da' choen' diža' nac yesonxene' le', na' gože'ne' cheyała' gwzejni'iden' yezica'chle bene' Israel, gože'ne':

—Toz neda' cheyała' gonxenle. Na' še note'teze bene' Israel chote' no beyixe' chonxene' da' bi nac Dios dogualje, cheyała' gotle ben' chon ca'. Lecze cheyała' gotle bene' chon yela' guaža'. Cheyała' yezi'laže'le ža che Dios na' bi cheyała' gonle žin yixe' iz che Dios caten' nžia' bia' bi gazle yežlion'. Le gon lni šone nia' tgüiz, cont yid yogo'le gonxenle neda'. Cheyała' gonele binlo yogo' bene' zito', le lecze bene' ziton' gogle Egipton'. Bi gwchixjwle yichje mechw da' cuejle bene' yaše' gualaž chele. Bitw gonle median len no'ole güezeb ca' ne bi' güezeb ca'. Bitw ne'le yela' ya' che Diosen'. Neca nele yela' ya' che bene' gwnabia' chele ca'. Bitw gagwle xpela' beyixe' be bi betw bene'. Toze ca cheyała' gonle da' zej to li len bene' gwni'a na' len bene' yaše', cheyała' gonle güen len yogo'lole'. Bi gwzenagle še no gwšabe' le'e mechw o bi da' gonze' chele cont gonle da' bi cheyała' gonle.

Nach Diosen' lecze gwne':

—Neda' se^la' to angl cont güia ne'e le'e na' che'e le'e latje ga nzi' Canaán dan' gwnia' gona' chele. Še gon^{le} can' nian', neda' gaclena' le'e na' gon^{le} gan lao gwdi^{le} caten' ti^{le} len be^{ne}' ca' zjaže' Canaán. Tgüej tgüeje' yešaša' na' gaclena' le'e gotlene', na' yeyoža' doxen gan' mbane latja' gac chele. Perw bitw soale ye^{la}' güexi'a len legaue' cont yesyega'ane', neca gonxen^{le} da' ca' chesonxene', san toze neda' gonxen^{le}. Le yo^{ch}in^j mes o bichle latje gan' chesonxene' da' ca' chesejnilaže', na' le got yogo'lole', le še bi gon^{le} ca', yeseziye'e le'e na' cate' gacbe'ele, len le'e ba chonxen^{le} da' ca' chesejnilaže'.

Can' gož Diosen' Moisésen' lo ya'a da' nzi' Sinaí.

32. Moisésen' bži'e chen che beyi^xe'

bene' Israel ca'

(Éxodo 24)

Nach Moisésen' gože' be^{ne}' ca' can' nac ley dan' bnežjw Diosen' le' lo ya'an na' yogi^{le}' gosene' yesone' can' žanna'. Nach bzoj Moisésen' len.

Beye^{ch}j ža Moisésen' bene' to mes ga yesote' beyi^xe' yesonxene' Diosen' xan Ya'a Sinaín' na' gože' be^{ne}' xcuide' ca' yesote' go'n na' yosozeye' late' xpela'ban' yesonxene' Dios. Nach x^{ch}en go'n ca', gašjon bži'e lo mesen' na' yegašjon bezi'e to lo' ša'. Gwdena' blabe' zižje dan' bžia Diosen' bia' yeson be^{ne}' Israel ca' na' dan' bžie' bia' gone' len legaue', na' da' yoble yogüe' gose^{ch}ebe' yesone' can' bžie' bia'.

Nach Moisésen' bži'e chen dan' yož lo' šan' yogo' bene' ca', na' gwne':

—Chen ni chonen cont cheyož chata'bia' gac dan' bžia Diosen' bia' gone' len chio'.

Beyoža' Moisésen' beche'e bene' biše' Aarón na' len Nadab na' Abiú bin' gosac bi' che Aarón, na' len yegayonši bene' gole blao na' gwloe' len legaque' late' lo ya'an con can' ba gož Diosen' le' yesone'. Diosen' gože'ne' bi güe'e latje yesegüe yogo'lol bene' Israel ca'. Nach Diosen' blo'elagüe' legaque'. Beyoža' cate' besyega'an zleze', gosagüe' txen xpela' bal be ca' gosote' gosonxene' Diosen'. Nach Diosen' gože' Moisésen' cue' yelate' cont na' gwnežjue'ne' chope yej ta'a gan' zjanyoj ley chen'. Da'nan' Moisésen' gwloe' na' Diosen' bolgüiže'ne' lo' bejw na'ate. Na' Moisésen' gwyo'e lo' bejon', na' bega'ane' na'ze len Diosen' lao choa ža. šlac bega'an Moisésen' lo ya'an len Diosen', bocua'ane' bene' Israel gualaž che' ca' lo na' Aarónna' len yeto bene' byo gose'e Hur, gosego'o lo ne'e bene' ca' šlac le' bi zoe'.

33. Diosen' gože' Moisésen' yeson bene' Israel ca' to yodao' ga yesonxene' le'

(Éxodo 25:1 — 31:11; Levítico 24:1-9)

Cate' Moisésen' gwzoe' lo ya'a da' nzi' Sinaí, Diosen' gože'ne' chaclaže' yeson bene' Israel ca' to yodao' da' chacte chedobe ga yesonxene' le', gože'ne':

—Gož bene' Israel ca' yosotobe' yogo' da' ca' yeseyažjde' cont yesone' to yodao' čhia' da' chacte chedobe, ľecze yesone' yogo' da' ca' yeseze ľo'enna'. Cheyaľa' gaquen doxen can' nac dan' gwlo'eda' le' na'a. Chyo'ole cheyaľa' gaquen 25 metr zлага', na' cheyaľa' gaquen 50 metr ton, zejen gan' chla' gwbižle par gan' chxoа gwbižle, na' soa puert čhen šľa'a gan' chla' gwbiž. Yeyečhjeten sen lache' da' nzi' lino, na' da' goxe' lachen' čhizle ca' bdope da' gacte yega'a cate' co'ole nez.

`Yodaon' dan' yesonen' cheyaľa' gaquen de gayo' metr zлага' na' šino' metr ton. Cheyaľa' gac ľe'e ze'e čhen de yagla', perw gaquen ga guacte yeyinjen cate' chgo'ole nez na' guacte yegoden' da' yoble cate' žinle ga soale to to ni'a. Yičhj yodaon' cheyaľa' gaquen tap di'ej, da' nechw dan' se ľo'ole cheyaľa' gaquen de lache' dan' nzi' lino, na' yesedan' angl bene' zjanzi' querubines, bene' yeseye' len zan do color. Cože' da' nga šej yetdi'ej da' gac de yiša' xa šib. Nach yetdi'ej de yid xa xila' cuenen da' xna, na' bzebte šej yetdi'ej yid xaba' da' ba nac šagüe'.

`Lo' yodaon' cheyaľa' yesenita' čhop cuart na' gualaz ze'e čhen, cheyaľa' se lache' da' nac cayanen' nac lache' nechw dan' ze yichjenna'. Cuart da' zelao zoa zito' cho'a yo'on, len gac latje čhia' da' chnabia' zaca'chgua. Latje nga xoašagüe'le caj dan' zejen zoacza' len ľe'e. Gaquen de yag na' gazjen oro. Lo'enna' co'ošagüe'le yej ta'a ca' gan' zjanyoj ley čhian'. Na' dan' xoa cho'a cajan' cheyaľa' gaquen de oro na' coženna' šyichj güeje yesenita' ľgua'a ľsaca'

che chop angl ben' zjanzi' querubines. Yesena' lježe' na' yosyotił xilen' gachol. Na' cože' dan' xoa cho'a cajan', na' soa' neda' yolgüiža' le'e bene' Israel na' yapa' le'e bin' cheyała' gonle.

`Lo cuart dan' zoa cho'enna' chyo'ole cheyała' yosonite' šone da' qui: to mes de yag da' yosoguazjen' oro ga yosocue'e yetextil, to candelers de dogualje oro, na' to mes dao' ga yosozeye' yal. Candelers gaquen ca to yag da' žia yej, na' lo xozen' ca' yesecua' gaž ga yosozeye' set. Na' mes dao' gan' yosozeye' yala' lecze gaquen de yag na' yosoguazjen' oro, na' dap squin chenna' yosozoe' tgüeje da' toše'. Na' ža che Dios yogo' xman bħoz ca' cheyała' yesose' yal bixjw lagüe šižinw yetextil na' yosocue'en lo mesa' chop neze de xop güeje. Na' cheyała' yosyoše'en lo ža che Dios, le yetextil qui gaquen lo na' Dios. Yeyoža', guac yesagw bħoz ca' yetextil gol ca', perw ne to noch no gac gagw len. Na' bħoz ca' cheyała' yosogüia yesene'e cont set da' chož lo' candelers yesalan' do ža do yel.

`Chyo'o yodaon' cheyała' yosozoe' to mes xen de yag da' yosoguazjen bronce na' yosozoe' tgüeje da' toše' dap squin chenna'. Na' lagüe mesa' yesote' beyixe' ca' yesonxene' neda'. Lecze chyo'ona' cheyała' yosozoe' yeto ga yosone'e da' gaquen de bronce.

`Yogo' da' qui cheyała' yesaquen da' gac yeso'e gate'teze, to ton cheyała' yesezoan da' nzi' argollas ga yesegüe'e yag cont gac yeso'en. Lecze gonle yogo' bichle da' chyažjele ca no platw na' xguague de oro,

na' ca no ša' de bronce cont yesonen žin gan'
gwzeye beyixe' ca' lo mes xen dan' se chy'o
yodaon'.

Beyoža' Diosen' gože' Moisésen' nac gonšagüe' to
yal da' yosozeye' tloaze lo' yodaon'. Ne to nono gac
gwčhin da' nga to gualaze'.

Lecze gož Diosen' le' Aarónna' na' bene' lo diaža
che' ca' legaque' yesaque' bχoz bene' yesone' da'
cheyala' gac lo' yodao' čhen'. Na' gože' Moisésen'
nac cheyala' gac xalana' bχoz ca' da' yosočhine' cate'
yesone' žin lo' yodaon'. Xalanen' yesonen' de lache'
da' nzi' lino, na' Aarónna', ben' nabia' bχoz ca',
cheyala' gwzoe' to gorra da' nac nža'le lao da'
chesečhin yezica'chle bχoz ca', na' čhaze' to lache'
ton da' moradw na' yeto da' nac ca chaleco na'
yesoan čhop yej, tgüejen to to yaxičhen', na'
yeseyojen la bene' šižinw cuen ca' gosac bene' Israel,
χop güej lagaquen' yeseda' le'e to to yejen'. Cože'
chalecon', perw lagüelen, yosode'e to da' yosožien'
šižinw dan' nac ca yejese dan' nac da' zaca', tgüejen
che to to cuen bene' ca'.

Lecze Diosen' gože' Moisésen' nac gone' to set
ziχ da' yosočhine' cate' to bχoz solagüe' gone' da'
cheyala' gone' lo' yodaon' da' nechw. Ne to nono gac
gwčhine' da' nga to gualaze'. Nach Diosen' gože'
Moisésen' naquen' cheyala' gone' Aarónna' len bi' che'
ca' lo na' Diosen' cont yesezolagüe' yesone' dan'
cheyala' yesone' lo' yodaon'.



Bene' Israel ca' gosonxene' to lgua'a lsaca' che to me' go'n.

Diosen' lecze gože' Moisésen' la čhop bene' ca' yesac yesone' yogo' da' ca'. Bezaleel gon len, na' Aholiab gaclene' le'.

34. Bene' Israel ca' bi bosozenague' che Diosen' na' gosone' to lgua'a lsaca'

(Éxodo 31:18 — 34:35)

Moisésen' jasoe' čhoa ža lo ya'a da' nzi' Sinaí. Lao da' čhoa žan' Diosen' gože'ne' bica' dan' cheyała' yeson bene' Israel ca'. Perw na' legaque' bi gosape' yela' chxenlaže' yesebeze' Moisésen'. Gosacžejlaže' na' gosacde' bich yežinen'. Da'nan' yogüe' gosenabde' Aarónna' gone' to čhop da' yesejnilaže' da' yesego'on legaque' nez yesežine' Canaán. Nach Aarónna' gwnabe' yogo' ret de oro dan' zjanała' no'ol ca', na' jasesanen'. Na' Aarónna' bosonen' lo yi' cont bene' to lgua'a lsaca' che to me' go'n. Beyoža' gože' bene' gualaž che', bene' Israel ca', me' go'nan' bebej legaque' Egipton'. Na' gože' legaque' yeyečhj ža yesone' to lni cheba'. Ca' goc, beyečhj ža gota' to lni xen čhegaque' na' gosote' zan beyixe' gosonxene' lgua'a lsaca' dan' nac ca me' go'n.

Diosen' ble'ede' dan' cheson bene' Israel ca', nach bene' mandaw la' beyetjte Moisésen' lo ya'an, le bene' Israel ca' bich chesone' can' bžie' bia' yesone' na' ba chesonxene' lgua'a lsaca'. Diosen' blocchgüe' legaque' na' gože' Moisésen':

—Gota' yogo' bene' ca' na' cueca' to yež len le' na' len bene' diaža čhio' ca'.

Perw Moisésen' gwnabe' goclen lao Diosen' bi gone' ca'. Jayse'ede' laže' Diosen' dan' gwlo'o cho'e gone' len Abraham, Isaac na' Jacob caten' gože' legaue' gwnežjue' zan bene' yesac lo diaža chegaue'. Lecze gože'ne' še gote' yezica'chle bene' Israel ca' nach bene' Egipto ca' yesene' Diosen' bebeje' legaue' Egipton' cont gonde' legaue' mal. Diosen' bzenague' dan' gož Moisésen' le' na' bečhoglaže' bi gote' bene' Israel ca'.

Nach gwzolao beyetj Moisésen' lo ya'an, zenoxe' yej ta'a ca' gan' bzoj Diosen' ley chen'. Cate' bežine' xan ya'an ble'ede' me' go'n de oron' na' bene' ca' chosoye'e chesonxene'ba', leca bloque'. Na' bzaļe' yej ta'a ca' lo yon' gosoxjen' besyeyacten da' bixjw. Nach bežue' me' go'n de oron' lecze bzoj btine'ba' na' gwdilchgüe' Aarónna'. Aarónna' gwnabe' yezi'xen Moisésen' che', gože'ne':

—Bene' quin' gosacžejlaže' na' gose'nde' to chop da' yesejnilaže' da' yesego'on legaue' nez, da'nana' gwnaba' ret ca', bzaļan' lo yin'. Can' goc, to gualaz me' go'na' bchojba'.

Perw bitw gože' Moisésen' diža' li.


Moisésen' ble'ede' bi cheson bene' ca' can' gwna Diosen', nach gože' legaue' yogo' bene' chese'nde' yesone' can' ža Diosen' šjasezie' cuite' na'. Nach bene' ca' zjanac xi'in diaža che da' Leví jasezie' cuiten'. Beyoža' gosodie' gan' nita' bene' ca' gosacļaže' yesonxene' lgu'a' lsacan' na' gosote' zane', yelate'ze ca' goc šon mil bene' ca' gosote'.



Moisésen' gwnabde' Diosen' bi gote' bene' Israel ca' yela'
güedenag chegaque'.

Beyoža' Moisésen' bolgüiže' Diosen' gwnabe' yezi'xene' che bene' gualaž che', bene' Israel ca'. Diosen' gwne' guaccze, perw gwne' bich cue'e legaue' nez. Nach Moisésen' gwnabe' goclen bi cuejyichje' legaue', na' Diosen' gwne' šejlencze' legaue'.

Beyoža' Diosen' gože' Moisésen' gonšagüe' yečhop yej ta'a ca' na' cue' lo ya'an cont gwzoj Diosen' ley čhen' da' yoble. Cate' gwloe Moisésen', Diosen' jayse'ede' laže' da' yoble bi cheyała' yesac bene' Israel ca' txen len bene' ca' zjaže' Canaán, neca cheyała' yesone' txen len ca' nac da' ca' chesejnilaže'. Lecze jayse'ede' laže' len ca' nac yeto čhop ley yoble che'. Da'n'an' Moisésen' jasoe' da' yoble yečhoa ža lo ya'an, bzoje' le'e yej ta'a ca' ši da' ca' non Diosen' mandadw yesone'. Beyoža' beyetje'. Cho'alagüen' chactiten dan' gwnelene' Diosen', perw le' bi gocbe'ede'. Cate' Aarónna' na' bene' ca' yezica'chle besele'ede' cho'alagüen', leca besežebe' šjasebigue' cuiten'. Perw gwdechle jasebigue' lao Moisésen' na' gože' legaue' yogo' da' ca' gož Diosen' le' cheyała' yesone'. Nach Moisésen' bcuaše' cho'alagüen' len to lache' bxin neče dan' besežebe' le', perw bate'teze cate' gwyeye' jašaljlene' Diosen' beque'e lachen', na' bocuaše' cho'alagüen' cate' chjayzoalene' bene' Israel ca' neče da' chactiten.



Beṇe' Israel ca' gosone' yodao' ǵhe Dios da' chacte
chedobe, na' gosonen' cayanen' blo'e Diosen' Moisésen'.

35. Bene' Israel ca' gosone' yodao' che Diosen' da' chedobe

(Éxodo 35 — 40)

Moisésen' btobe' yogo' bene' Israel ca' na' bšajlene' legaque' che yodao' dan' chaclaže' Diosen' yesone'. Gwnabde' legaque' šjasesane' da' zjade chegaque' con da' yesezande' ca da' yosočhine' yesone' yodaon'. Lecze Moisésen' gože' legaque':

—Note'teze le'e guac gaclenle goncho yodaon' dan' chacte chedobe.

Lecze gwne' ben' gože' Bezaleel na' ben' goclen le' ben' gože' Aholiab bene' ca' yosose'e žinna'. Yogo'ze bene' besyebede' gac yodaon' na' gwzolao jasesane' da' ca' chyažjen. Leca da' zan da' jasesane'. Nach Moisésen' gože' legaque' bich šjasesanen', le ba deczen ca cheyała'. Na' bene' zan bene' ca' bosošab cuine yesaclene' yesone' žinna'.

Bene' güen žin ca' gosone' yogo'loł can' gož Diosen' Moisésen' caten' zoe' lo ya'an. Gosonšagüe' yagla' ca', lache' ca', bica' da' ca' yosočhine' dan' yeseže'e lo'enna', set zixa' na' yala', na' bosočhine' yogo' da' ca' jasesan bene' ca'. Lecze bosočhine' plata dan' goseyixjw bene' Israel ca' caten' bosolabe' bał bene' byo zjanac. Lecze gosone' xa bχoz ca'. Cate' beyož dołolen, Moisésen' gwna' bgüien' na' ble'ede' doxenen bega'anczen cayanen' nac dan' blo'e Diosen' le'.

Nach Diosen' gože' Moisésen' gwlise' yodaon' na' gwži'en set zixa' cont nacia' yodaon' naquen che Dios. Na' gwne' cheyała' la' gontie' b̥xoz ca' lo na' Diosen' cont yesezolağüe' yesone' žin lo' yodaon'. Na' ben Moisésen' len ca'. Cate' goc yogo' da' qui, ba zej gac tgüiz besyežaš bene' Israel ca' Egipton'.

Beyož goson bene' Israel ca' dan' gož Diosen' legaue', bejw dan' gwžialao laogaquen' šlac zjangüe'e nez besežinte' ya'a da' nzi' Sinaí, betjen na' bcue'ejen yodaon' cont blo'en legaue' Diosen' zoe' na'. Cana' gwzolao bejon' blo'en legaue' batca' yosyotobe' yodaon' na' yesegüe'e nez na' batca' bi yesone' ca'; le chzen lo be'ze bich chcue'ejen yodaon' cate' Diosen' chaclaže' yesegüe'e nez.

36. Diosen' gože' Moisésen' bica' da' ca' che'nde' šjasesan bene' Israel ca' yesonxene' le'

(Levítico 1— 7; 17; Números 5; 15:1-31; 28:1-15)

Diosen' gože' Moisésen' zan cuen da' nža' nža'te zjanaquen da' cheyała' šjasesan bene' yesonxene' le'. Gože'ne' šjasesane' beyixe' be yesote' yosolalje' x̥chemba' ca no go'n̥, no xila', no šib, na' lecze no bgog no plomtxtil. Na' lecze gože'ne' šjasesane' ca no trigw, no cebada.

Baļ cuenen gože'ne' cheyała' yosozeye' doxenen lao Diosen', na' yebaļen guac yesagüe' late' güejen yeyož yosozeye' laten' lao Diosen'. Na' gože'ne' baļen' cheyała' šjasesane' tbio' güeje, baļen to xman güeje, na' baļen yogo' ža. Lecze cheyała' šjasesane' no da'

ca' cate' yesaclaže' yeso'e yela' choxclen che Diosen',
na' cate' chesego'o cho'e lao Diosen' yesone' bi da'
yesone', na' cate' ba gosone' da' xinj. Leczē guac
šjasesan bene' no da' ca' con cate' nalaže' gwnežjuen'
do yičhj do laže'.

37. Bxoz ca' gosezolagüe' gosone' xšin Diosen'

(Levítico 8 — 9)


Šlac gwzōa Moisésen' lo ya'a da' nzi' Sinaí,
Diosen' gože'ne' nac cheyała' gone' bxoz ca' lo' na'
Diosen' cont yesezolagüe' yesone' xšinen'. Nach
Moisésen' btobe' yogo' bene' Israel ca' cho'a yodaon'
dan' chacte chedobe. Bguazje' Aarónna' na' bi' che
Aarónna', na' beyoža' bguacue' Aaronna' lache' da'
naquen che bxoz blao, na' bi' che' ca' gwłize'
legaue' lache' da' naquen ca che bxoz ca'
yezica'chle. Beyoža' Moisésen' bži'e set zix lo' yodao'
čhegaquen' na' bica' da' ca' že' lo'enna', na' lecze ca'
bene' len bxoz cob ca'.

Nach Aarónna' len bi' che' ca' gosexoa taquen'
yičhj to go'n, na' Moisésen' betue'ba' neche
xtoła'gaue'. Bzeye' seba' lo mes xen cont gosonxene'
Diosen' na' da' bega'an cheba' bzeyen' zito' gan'
zjaniten'.

Beyoža' betue' to xila' be yag na' bzeye'
doxemba' cont bebe Diosen'. Leczē betue' yeto xila'
be yag be nacho gotba' neche yesezolagüe' yesone'
žin ca bxoz, na' gwdebe' xchen xila' gwchopen' bxoz

ca'. Gwdeben' yid nague' licha, xben xene' da' zoa
 taque' licha, na' xben xene' ni'e licha. Beyoža' blalje'
 chen dan' bega'ana' xni'a mes xen gan' gosote' beyixe'
 gosonxene' Diosen' na' bgoxe' Aarónna' len bi' che'
 ca' xejsaban', late' xchetban', seba', na' bela' lom
 xamba' da' licha, na' yetextil dan' bibi levadura yo'o.
 Na' gože' legaue' yeselise' da' ca' yesonen' lo na'
 Dios, nach bzeye' yogon'. Lecze gosone' lo na'
 Diosen' cho'alcho' xilan'. Beyoža' Aarónna' len bi' che'
 ca' gosoye' belan' bega'an che xila' gwchopa' na'
 gosagwden' yetextil. To xman gosežede' gosone' yogo'
 da' qui.

Cate' beyož xman, Aarónna' bnežjwche' yeto
 beyixe' be bzeye' late' güeje cheba' neche xtole' na'
 yetoba' be nacho bnežjue'ba' bzeye' doxemba' lao
 Diosen', na' bene' mandadw yezica'chle bene' Israel
 ca' bosonežjue' Diosen' beyixe' be bzeye' neche
 xtoła'gaue'. Lecze jasesane' ca no trigw, no cebada,
 na' bosonežjue' beyixe' be gosagüe' txen. Na' bene'
 Israel ca' gosone' to to da' ca' dan' gož Diosen'
 legaue' yesone'. Da'nan' gwseła' Diosen' yi' da' bchoj
 lo' bejw cont bzeyen to ši'i yogo' da' ca' ncua' lo
 mes xen gan' gosote' beyixe' na' bosozeyen'
 gosonxene'ne'. Cate' besele'ede' dan' goca' gosacbe'ede'
 Diosen' nape' yela' guac xen.



Bosozeze' no go'n, no xila', no šib lo mes xen gosonxene'
Diosen'.

38. Ley ca' da' žan can' cheyała' yeson b̥xoz ca'

(Levftico 21 — 22)

Ca nac b̥xoz ca', neche xšin Diosen' gosone',
Diosen' b̥zie' bia' to ɕhope da' bi cheyała' yesone' da'
guac yeson bene' yoble. B̥zie' bia' bi gac šjasecuaše'
bene' guat cate' yesate', lete guac šjasecuaše' xaxne'e,
bi' ɕhe', bi' biše' na' bi' zane' bi' ne zoa to gualaz, le
še yesoxe' to bene' guat, gonen cont bich yesaque'
xilaže' lao Diosen' na' bi gac yesone' žin ɕhe b̥xoz to
ši'i dao' še ca'. Še b̥xozen' gwšagne'e, cheyała' si'e to
no'ol güego' no'ole biña' soalene' bene' byo, o to
no'ol güezebe no'ol got bene' ɕhe'. Ben' goc b̥xoz
blao, leyna' nžian bia' gonche' da' zjanacch zdebe,
nžian bia' ne to bene' lo' yo'o ɕhe' bi gac šjacuaše',
ne xaxne'e. Neca gac gwšagna'lene' no'ole güezebe
no'ole ba got bene' ɕhe'. Lecz ne to bene' byo bene'
nac bene' xinj bi gac gaque' b̥xoza'.

Diosen' lecze gože' b̥xoz ca', con caten' zjanaque'
xilaže' lagüe da' ba gosone' yogo' da' ca' b̥zie' bia'
yesone', cana'zen' guac yesagüe' dan' cheyała' yesagw
b̥xoz ca' dan' chjasesan bene' Israel ca' yezica'chle
ɕhe Diosen'. Lecze guac yesagw bene' lo' yo'o ɕhe
b̥xoz ca' da' qui. Diosen' lecze gože' b̥xoz ca' bi
yesezi'e beyixe' be zjanac be xinj be šjasesane'
yesonxene' le'.

39. Chope xi'in Aarónna' bi gosone' can' gwna Diosen' na' gosate'

(Levítico 10:1-7)

Gwnita' chop xi'in Aarónna' bene' zjangole, toe' gože' Nadab na' yetoe' Abiú. Tñi'a bi bosozenague' che Diosen' na' bi gosone' cayanen' gwna Diosen' cheyała' yeson b̥xoz ca' caten' chesegüe'e yi' lo' braser cont chosozeye' yal chesonxene' le'. Diosen' bi gwyazlaže' dan' bi gosonen' ca n̄zie' bia', na' gwsele' yi' da' goten' legaque' bzeyen legaque' lo' yodaon'. Nach gwna Moisésen':

—Diosen' che'nde' gac da' ca' cayanen' že'na'.

Nach Moisésen' goxe' bene' biše' bla'a chegaque' na' bene' mandadw besyeyo'e bene' guat ca' zito' latje gan' zjanite'na'. Nach Moisésen' gože' Aarónna' len xi'ine' ca' yechope, ben' gose'e Eleazar na' Itamar, gože' legaque' bi gac yesyežaše' lo' yodaon' cont šjasene' txen len bene' diaža chegaquen' bene' chesegüine'de' che bene' ca' gosat, le za' bže'etie' legaque' set zixen', zeje diža' ba zjanaque' lo na' Dios par yesone' xšine' lo' yodaon'. Nach gosone' con can' gož Moisésen' legaque'.

40. Diosen' bi goclaže' yesagw bene' Israel ca' bał yela' guagw

(Levítico 11)

Diosen' gože' Moisésen' len Aarónna' yese'e bene' Israel ca' guac yesagüe' xpela' bał beyixe', na'

yebałba' bi gac. Gwne' guac yesagüe' xpela' beyixe' ca' chesaš yežlion' be chosyozoeba' da' chesagwba' ben' lecz zjanac žit xogo'ban' ċhople, ca no vaca', xila', šib na' bžina' yixe'. Na' bžie' bia' bi gac yesagüe' be ca' yezica'chle, ca no coš, conejw na' camello, neca gac yesoxe' beyixe' qui cate' ba gosatba'. Bene' Israel ca' gosene' beyixe' ca' bžie' bia' bi yesagüe' bi zjanacba' xilaže' lao Diosen', na' gosene' be ca' nžie' bia' yesagüe' zjanacba' be xilaže'.

Diosen' lecze be'e latje yesagüe' xpela' note'teze beł be že' lo nis con še zjazoa da' dao' zjanac ca xilba' na' be zjažia xeza'ba', perw bi gac yesagüe' nochle be yoble chesaš lo' nisa'. Be'e latje yesagüe' xpela' be zjažia xil, perw bi be'e latje yesagüe' xpela' be ca' zjazoa xil ben' chesagw da' zgot na' be chesagw da' do'ožo'. Be'e latje yesagüe' to cuen biše', perw bi be'e latje yesagüe' nochle be dao' ca' bi zjaže' žit. Na' bi be'e latje yesagüe' ca no guaše' na' yogo' be ca' zjanxob le'e. Še to beyixe' ben' bososi'e be bi nac xilaže' lao Dios lažo'ba' lagüe xšinłaze' da' chosoċhine', da' nga lecze bich naquen xilaže' lao Dios še ca'. Bał da' ca' cate' bi zjanaquen xilaže' lao Diosen', ca no da' ca' zjanac de ya, cheyała' yeseyiben' cate' za' yosoċhinen' da' yoble, da' ca' yebałe, ca no da' zjanac de gona', cheyała' yosozoxjen'.

41. Diosen' gože' Moisésen' nac yeson bene' bi zjanaque' xilaže' lagüen'

(Levítico 12 — 15; Números 19)

Da' zan da' gosonen cont bene' Israel ca' bi
gosaque' xilaže' lao Diosen'. Le no bene' da' yižgüe'
le'e yid xe', no bene' zoe' to yežo' da' yož gože' bi
gosaque' xilaže' lao Diosen'. Lecze bi gosac xilaže'
no bene' beḡue' o bchele' da' bi nac xilaže' ca no
bene' guat, no be guat, o no beyixe' be gwna Dios
bi nachba' xilaže' lagüen'. Lecze no no'ol xabi'in bi
goque' xilaže' žinte ba goc zan ža gwzoa bi' che'.
Cate' bi da' ca' goson bene' ca' o bi da' ca' gosac
cheḡaque', cana' bi gosaque' xilaže' lao Diosen'. To
bene' bi nac xilaže' lao Diosen' cheyała' choje' šjasoe'
zito' latje gan' zjanite'na'. Bi gac šjasie' gała' ga
zjanita' bene' yezica'chle, na' lecze bi goso'e latje šeje'
yodaon'. Yogo' bene' chele' o lape' ben' bi nac
xilažen', lecze len le' bi chaque' xilaže' lao Diosen'.
Cate' za' yeyaque' xilaže' lao Diosen' da' yoble,
cheyała' gone' güiša' gozj na' chib xałane', na' tgüeje
cate' benen byen jasane' bi da' jasane' che Dios cont
gwnitlao xtołen' o benen byen cueze' gon to bḡoz da'
cheyała' gone' cont yeyaque' xilaže' lao Diosen'.

42. Diosen' bžiache' bia' len Moisésen' bichle da' goclaže' yeson bene' Israel ca'

(Levítico 18 — 20)

Diosen' bžie' bia' ye da' zan da' goclaže' yeson
bene' Israel ca'. Diosen' gože' legaque' še yesone'

can' ža ley che' ca', yesenite' mbalaz na' soacze' len
 legaque'. Bžie' bia' gwne' to bene' byo bi gac
 gata'lene' no'ole nac no xne'e, no bene' zane', no bi'
 che', o no'ole zjanac bene' bagw lo' diaža che', neca
 to no'ole bi gac gata'lene' bene' byo nac bene' bagw
 lo' yo'o che'. Yeto da' bžie' bia' bi yesone', ne to
 bene' byo bi gac gata'lene' yeto bene' byo ca xo'ole',
 ne no'ola' ca gac gata'lene' yeto ljež no'ole, na' lecze
 ne to benach ca gac gone' len beyixe' dan' zjanac
 qui. Diosen' gwne' bene' ca' zjaže' ga mbane Canaán
 chesone' yogo'lol da' mal qui, da'nan' yeque'e yežlio
 chegaquen' na' gwnežjuen' bene' Israel. Diosen'
 goclaže' yesone' yogo' da' ca' zjanyoj le'e ley ca'
 bcua'ane' len legaque', cont na' bi gone' ga
 yesezaca'zi'e.

Diosen' gože' bene' Israel ca' cheyała' yesacche'
 bene' laždao' xilaže' clel ca bene' yezica'chle, yesone'
 yogo' da' ca' zjanyoj le'e ley chen' dan' bcua'ane' len
 legaque', le can' nac le' bene' laždao' xilaže' juisyw
 bene' bibi da' mal chon. Jayse'ede' legaque' cheyała'
 yesape' bala'an xaxne'e, yesyezi'laže' na' bibi žin
 yesone' lo' ža che Dios, na' ne to lgua'a lsaca' bi
 yesone'. Lecze bi cheyała' yesebane', neca yesonlede'
 bene', neca yesegüe'e da' bałi len la Diosen' še to da'
 bi yesezaque'de' yesone'. Gože' legaque' cheyała'
 yeso'e laxjw bene' güen žin chegaquen' cate' cha' to
 to ža, na' cheyała' yesaque' bene' šagüe' len no bene'
 cuež, bene' lchol, bene' yaše' na' bene' zito'. Gože'
 legaque' bi cheyała' yesegue'ede' bene' Israel gualaž
 che' ca', na' ne to bene' ca cheyała' yesego'olaže'.

Cheyała' yesone' güen len bene' yezica'chle ca güen cheson len cuine'. Bi cheyała' šja'aque' lao bene' güeneya'a o bene' chosolgüiž bene' guat. Cheyała' yosoze'e na' yosochixe' binlo bica' da' chesote', toz xšinłaze' da' cheyała' yosočhine' cate' yosochixe' bi da' yesa'ogtie' len cate' bi da' yesote'. Lecze gože' legaque' cheyała' yesote' note'teze bene' got to bi' che' cont chonxene' da' bi nac dogualje Dios. Diosen' jayse'ede' laže'gaque' cheyała' yesone' can' zjanyoj le'e ley ca' bocua'anlene' legaque', cont na' yežlio da' nzi' Canaán gac lo na'gaque' na' yeson liž xlatje' na'.

43. Diosen' gože' Moisésen' bica' lni cheyała' yeson bene' Israel ca' yesonexene' le'

(Levítico 16; 23; Números 28:16 — 29:40)

Diosen' gože' Moisésen' šjayse'ede' laže' bene' Israel ca' bi cheyała' yesone' žin lo ža bzebe che to to xman, le žana' nac ža che Dios. Cheyała' yesone' doxen žinna' lao xop ža ca'. Na' lo ža dan' nac che Dios cheyała' yesedobe' cho'a yodaon' cont yesonxene' le'.

Na' Diosen' gože' Moisésen' bi lni cheyała' yeson bene' Israel ca' yogüiz na' bi ža nži'e bia' yesonen'. Gosac gaž lni blao čhegaque' yogüiz. Lni nechw, lni da' nzi' Pascw gosonen' ža žta' che bio' nechw che iza'. Na' gosote' no xila' dao' na' beyož bosolalje' xčhemba' lao Diosen' gosagüe'ba' ližgaquen'. Gosone' lni nga cont jasyeze'ede' can' ben Diosen' bebeje' legaque' Egipton'. Na' lni gwchope lecze gosonen'

bio'na' gwzolaon ža šino' che bio' nechon' na' beyožen ža tochoa. Lni nga bososi'en ža ca' cate' chesagüe' yetextil da' bibi levadura yo'o. Na' yogo' ža che lni nga gosote' beyixe' gosonxene' Dios.

Lecze lo xman che lni cate' gosagüe' yetextil da' bibi levadura yo'o gosone' yeto lni da' nzi' Lni Che Coseš Nechon'. Jasesane' lao bxož štaca' no trigw, na' cebada da' besyelape' da' nechw lo iza', na' zeje diža' gosonen' lo na' Dios. Bi goc yesagüe' cosešw coba' neca goc yesonen' yetextil še bina' šjasesane' laten' lao bxožen' yesonxene' Dios.

Gwde šiyon ža ba gosone' Lni Che Coseš Nechw, gosone' yeto lni da' nzi' Pentecostés. Cate' gosone' lni nga jasesane' lao Diosen' yetextil da' gosone' len no trigw no cebada che coseš chegaque' da' goc lo izen'. Na' lecze gosote' no beyixe' gosonxene' Dios. Diosen' lecze gože' legaque' cate' yosyotobe' coseš chegaque' bi yosyotobe' dololen san yosyocua'ane' late' xłago' cont bene' zjanac leca bene' yaše' šja'aque' šjasyetoben'.

Ža nechw che bio' gaže gosone' lni da' nzi' Lni Che Trompeta Ca' cate' bosocueže' trompeta gosaxe' bene' Israel ca' na' besyedobe' cho'a yodao' dan' chacte chedobe na' gosote' beyixe' gosonxene' Diosen'.

Ža ši che bio' gažen' gosone' lni dan' bososi'e Ža Cate' Chnitlao Doļa'. Da' nga goquen to lni blao, le lo žana' bene' Israel ca' cheyaļa' yese'e Diosen' chesyetinjde' che da' mal gosone' do iz na' yesenabe' yezi'xene' chegaque'. Lo ža nga bxož blaon' gwṇabde'

Diosen' yezi'xene' ċhe yogo' da' mal zjanon bene'
 Israel ca' lao iza'. Lao do iz totec ža nga gota' latje
 te to bene' cože' lache' dan' ze lo' yodaon' gan' nzi'
 Latje Ga Zoa Dios. Cože' lache' na' gwxa caj gan'
 zjango'ošagüe' yej ta'a ca' gan' zjanyoj da' ca' non
 Diosen' mandadw yesone'. Latje nga goquen gan' betj
 Diosen' to lo bejw cože' caja'. Toz ben' goc bꝥoz
 blao goc gwyo'o na' lo žana' na' bia'cze beꝥue' xċhen
 beyiꝥe' da' bžie' lo cajan'. Perw cheyała' gone'
 cayanen' gwna Diosen', le še bi gone' ca', na' gate'.

Ža šino' ċhe bio' gažen' gwzolao lni dan' bososi'e
 Lni Ćhe Ranšw Yix. To xman gosone' lnin'. Ža
 nechw len ža xono' ca cheyož lnin' gosaquen ža ċhe
 Dios cate' bi gosone' žin. Lo ža ca' bene' Israelen'
 besyedobe' cho'a yodao' dan' chacte chedobe. Cate'
 gwzolao lni nga, bene' že' to to lo' yo'o benen byen
 gosone' to yo'o de xoze' yag o de xis laga' na'
 gosenite' lo'enña' lo xmanña'. Gosone' da' qui cont
 goclenen legaꝥue' jasyeze'ede' can' gosac liže' gan'
 gosenite' šlac zjangüe'e nez caten' besyeya'aque'
 Egipton' besyežintie' Canaán. Lni nga goquen to da'
 gosenita'chgüe' mbalaz, na' goso'e yela' choꝥclen ċhe
 Dios neꝥhe goc coseš ċhegaꝥue' na' len ċhe yogo' da'
 güen bene' len legaꝥue'. Lo ža ca' bene' Israel ca'
 ľecze benen byen gosote' beyiꝥe' be jasesane' lo na'
 Diosen' na' bosozeye'ba' gosonxene'nen'.

44. Gosote' to bene' gwneye'e che Diosen'

(Levítico 24:10-23)

Gwzoa to bene' byo bene' goc xen' bene' Egipto, na' xne'en goque' bene' Israel. Tni'a gwdile' len yeto bene' byo yoble na' gwneye'e che Diosen', nach Diosen' gože' Moisésen':

—Gwche' bene' byo nga zito' latje gan' zoale nga na' lecze gwche' yogo' bene' ca' gosende' dan' gwnen'. Yogo' bene' ca' gosende' can' gwnen' cheyała' yesexoa taquen' yichjen', na' yeyoža' yosotacue' le' yej yesottie'ne'. Can' cheyała' gonle len note'teze bene' chneya' chia'.

Na' ca' gosone'.

45. Diosen' bnežjue' Moisésen' ley da' bžian bia' che yežlio na' che yo'o ca'

(Levítico 25)

Diosen' gože' Moisésen' ye'e bene' Israel ca', can' de ža da' chesyezi'laže', lecz ca' cheyała' gata' iz cate' bi yesone' žin yežlio čhegaquen'. Cate' gac xop iz chesone' žin yežlio čhegaquen', lo iz gaže bi cheyała' yesonen' žin. Lo iza' bi gac yesazen', neca yesechoguen' yixe', na' neca yosyošibe' da' chbian. Bene' yaše' na' bene' zito' ca' guac šjasede' lo yežlio ca' lo iza', na' legaque' gac yosyotobe' da' de lagüenna' da' chcha'o chxen to gualazen, lecze guac yesagw beyixe' ca' dan' ze lagüenna'. Xan yežlion'

lecze guac yotobe' late' güeje da' qui, perw cheyała' gwčhinen' lo žana', na' bi gac yotobe' da' co'šagüen'.

Cate' gac šiyon iz, zeje diža' ba gwde gaž ni'a izen' cate' chosyocua'ane' yežlion' bi chesonen' žin, cana'ch cheyała' yesebeje' yeto iz nya' cate' bi chesone' yežlion' žin, na' yesezi'e iza' Jubileo. Lo iza' bene' Israel ca' bi gac yesaze' yežlion'.

46. Diosen' gože' Moisésen' nac cheyała' yeson bene' yesonxen le'

(Levítico 27)

Cate' to bene' chgo'o cho'e šjasane' to da' šjasane' lao Diosen', guac co'o cho'e šjasane' no bene', no beyixe', no yo'o o no yežlio. Še co'o cho'e šjasane' bene', cheyała' gwnežjue' bχozen' mechw, con ca zaca' ben' še bał izde' na' še no'ole o še bene' byo. Še co'o cho'e šjasane' to beyixe' be mbeje' cont gonxene' Diosen', cheyała' gote'ba' gonxene' le', le lenna' zeje diža' chone'ba' lo ne'e. Perw še nacba' yeto cuen beyixe' yoble be bi zaca' yesote'ba' yesonxene' Diosen', guac gote'ba' si' bene' leba' na' gwnežjue' bχozen' mechw dan' gwxie' cheban'; o še bi, guac chixjue' bχozen' gaca'ten' zaca'ban' ten yelate'ch, cont na' gaczeba' lo ne'e. Še co'o cho'e gwnežjue' to yo'o goquen lo na' Diosen', nach guac gote' yo'on, na' gwnežjue' bχozen' mechw dan' si'e chenna', o še bi, guac güe'e bχozen' mechw ten' yelate' can' zacan'na', cont na' yega'anlencze' yo'on. Še co'o cho'e gone' lo na' Diosen' late' yežlio čhen', nach bχoz ca' yososaque'

gaca'te zaca' yežlion' len da' za' yelape' lagüenna'
cate' za' žin iz dan' zjansi'e Jubileo, nach xan
yežlion' güe'e bxozen' laxjw yežlion' ten' yelate' can'
zaca' doxenen, o chixjue' chen tgüiz güeje, cont na'
yega'ancze lo ne'e yežlio chen'. Na' ca yezica'chle
yežlio che bene' Israel ca', yežlio nga yeyaquen lo
na' xanczen cate' chžin iz da' nzi' Jubileo.

Gota' bal da' bi goc yesego'o cho'e yesonen' che
Dios, le ba nacczen che', ca no beyixe' be ca'
gosalje da' nechw lao to to beyixe'. Lecze ca' to
cuen da' chchoj lao ši cuen to coseš ba nacczen lo
na' Diosen', na' lecze to cuen lao ši cuen beyixe'
chegaque' ba zjanacba' lo ne'e. Na' ca nac note'teze
bene' güen da' xinj ben' gwna Diosen' cheyała'
yesote'ne', bene' qui bi gac yesyele' la'czła' yesaclaže'
yeseyixjue' mechw o yesote' no beyixe' gualazgaque'.

